

Na osnovu člana 4.8. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11) i čl. 6. i 7. Pravilnika o tarifnom postupku (“Službeni glasnik BiH”, broj 44/05) i Zaključka Državne regulatorne komisije za električnu energiju broj: 04-28-272-6/11 od 8. novembra 2011. godine, na sjednici Državne regulatorne komisije za električnu energiju održanoj 26. aprila 2012. godine, donijeta je

ODLUKA

1. “Elektroprijenosu Bosne i Hercegovine” a.d. Banja Luka (Elektroprijenos BiH) određuje se potrebni godišnji prihod za 2012. godinu u iznosu od 104.768.603 KM i utvrđuje tarifa za usluge prijenosa električne energije (mrežarina) za preuzetu električnu energiju sa mreže prijenosa, kako slijedi:
 - dio prijenosne mrežarine koji se odnosi na energiju iznosi 0,564 feninga/kWh,
 - dio prijenosne mrežarine koji se odnosi na snagu iznosi 1,473 KM/kW.
2. Nezavisni operator sistema u Bosni i Hercegovini i Elektroprijenos BiH su dužni da po isteku svakog kalendarskog mjeseca, u saradnji sa vlasnicima licence za distribuciju električne energije i kvalificiranim kupcima koji su direktno priključeni na prijenosnu mrežu, sačine izvještaj o veličinama energije i vršnih opterećenja u svim tačkama preuzimanja. Na osnovu ovakvog obostrano potpisanog izvještaja fakturiraju se mrežarine za energiju i snagu.
3. Tarifa određena ovom odlukom koristi se prilikom određivanja tarifa/cijena za krajnje kupce, prema strukturi tarifnih elemenata u okviru pojedinih kategorija potrošnje.
4. Ova odluka stupa na snagu danom donošenja, a primjenjuje se od 1. decembra 2012. godine.

Dispozitiv odluke objavljuje se u “Službenom glasniku BiH” i službenim glasilima entiteta i Brčko Distrikta Bosne i Hercegovine.

Obrazloženje

Uspostava Kompanije za prijenos električne energije u Bosni i Hercegovini omogućena je donošenjem *Zakona o prijenosu, regulatoru i operatoru sistema električne energije u Bosni i Hercegovini* (“Službeni glasnik BiH”, br. 7/02, 13/03, 76/09 i 1/11) i *Zakona o osnivanju Kompanije za prijenos električne energije u Bosni i Hercegovini* (“Službeni glasnik BiH”, br. 35/04 i 76/09).

“Elektroprijenos Bosne i Hercegovine” a.d. Banja Luka (u daljem tekstu: Kompanija) vlasnik je licence za obavljanje djelatnosti prijenosa električne energije, u skladu sa odlukom Državne regulatorne komisije za električnu energiju (u daljem tekstu: DERK), broj: 05-28-323-15/06 od 28. juna 2007. godine (“Službeni glasnik BiH”, broj 54/07).

Kompanija se shodno članu 12. *Metodologije za izradu tarifa za usluge prijenosa električne energije, nezavisnog operatora sistema i pomoćne usluge – Prečišćeni tekst* (“Službeni glasnik BiH”, broj 93/11 – u daljem tekstu: *Tarifna metodologija*), finansira iz pružanja

usluga kupcima i proizvođačima, koje obračunava i fakturira po odobrenoj mrežarini i iz drugih izvora, kao što su naknade za priključak na prijenosnu mrežu.

Postupak za određivanje tarifa za usluge prijenosa električne energije pokrenut je u formalnom smislu na inicijativu Državne regulatorne komisije za električnu energiju zaključkom broj: 04-28-5-272-6/11 od 8. novembra 2011. godine (o čemu je Kompanija upoznata obaviješću broj: 04-28-5-272-7/11 upućenom 8. novembra 2011. godine), nakon čijeg je donošenja Kompanija formulirala zahtjev za određivanje tarifa sa odgovarajućim podacima, pod brojem: 01-6255/11 od 10. novembra 2011. godine (zaprimljen u DERK-u pod brojem: 04-28-5-272-10/11 od 10. novembra 2011. godine). Podaci su dostavljeni na obrascima propisanim *Odlukom o određivanju obrazaca za dostavljanje podataka u tarifnom postupku* ("Službeni glasnik BiH", broj 44/05) sa potrebnim priložima.

U skladu sa čl. 4. i 9. *Pravilnika o tarifnom postupku*, iskazani podaci moraju biti jasno izloženi, tako da omogućavaju njihovu potpunu identifikaciju i moraju pružiti dovoljno informacija da bi se mogla donijeti odluka.

Razmatranje zahtjeva za tarife kroz postupak odobravanja tarifa u najvećoj mogućoj mjeri mora ispoštivati osnovna načela koja propisuju da će tarife biti pravedne i razumne, ravnopravne, zasnovane na objektivnim kriterijima i na opravdanim troškovima i određene na transparentan način. Podnosilac zahtjeva za odobrenje tarife dužan je dokazati da predložena tarifa ispunjava zahtjeve iz zakona Bosne i Hercegovine i pravila i propisa DERK-a.

U zahtjevu Kompanije navodi se da su ukupni rashodi u 2012. godini planirani sa povećanjem od 3,77% u odnosu na procijenjene iz 2011. godine, odnosno da su ti rashodi veći za 10,29% u odnosu na odobrene ukupne rashode od strane DERK-a za 2010. godinu. Takođe u zahtjevu Kompanije se navodi da "*ukupan prihod koga treba obezbijediti od usluge prenosa električne energije bez pokrivanja troškova povrata na kapital za predmetnu godinu je 140.108.132 KM*", te "*da je ukupan prihod koga treba obezbijediti, kako bi se pokrili troškovi prema Metodologiji za izradu tarife, za Kompaniju u 2012. godini 148.708.132 KM*". U zahtjevu su navedeni dodatni prihodi koje Kompanija ostvaruje kroz svoje poslovanje, pa se zahtjev rezimira konstatacijom da se potrebni prihod Kompanije u 2012. godini osigura u iznosu od 119.414.229 KM primjenom tarife koja se odnosi na preuzimanje energije sa prijenosne mreže i 14.870.813 KM primjenom tarife koja se odnosi na injektiranje energije u prijenosnu mrežu.

DERK je izvršio temeljan pregled dokumentacije Kompanije, pa se u nastavku tarifnog postupka moglo pristupiti ocjeni svih podnijetih dokaza uz pridržaj prava DERK-a da traži dodatne podatke i informacije kada to bude smatrao potrebnim.

Zahtjev Kompanije je rješavan provođenjem postupka formalne rasprave, u svemu prema odredbama *Pravilnika o javnim raspravama* ("Službeni glasnik BiH", broj 38/055). U smislu odredbe člana 45. ovog pravilnika DERK je kratkom obaviješću u dnevnim novinama i na svojoj internet stranici upoznao javnost o pokrenutom tarifnom postupku i mogućnošću zainteresiranih članova javnosti da se neposredno upoznaju sa svom raspoloživom dokumentacijom i upute pisane komentare u vezi predmeta tarifnog postupka.

Obavijest za javnost je pozvala i lica zainteresirana da u postupku formalne rasprave učestvuju kao umješaci da pismeno dokažu svoj interes, te najavila održavanje formalne rasprave o zahtjevu.

Nakon dostavljanja zahtjeva za stjecanje statusa umješača, DERK je zaključkom broj: 04-28-5-272-19/09 od 24. novembra 2011. godine dozvolio učešće u postupku u svojstvu umješača kako bi saslušao svjedočenja o pozicijama i interesima slijedećih subjekata: MH “Elektroprivrede Republike Srpske”, Matično preduzeće, a.d. Trebinje, JP “Elektroprivrede Hrvatske zajednice Herceg Bosne” d.d. Mostar, JP “Elektroprivrede Bosne i Hercegovine” d.d. Sarajevo i “Aluminija” d.d. iz Mostara.

Umješači nisu koristili pravo da izvrše neposredan uvid u cjelokupnu dokumentaciju zahtjeva za tarife, a pravo da do 22. novembra 2011. godine dostave komentare na tarifni zahtjev, do zaključenja tog roka, iskoristila su samo sindikalna udruženja koja djeluju u okviru Kompanije.

Pripremna rasprava o podnijetom zahtjevu Kompanije, na kojoj je utvrđena lista pitanja koje je neophodno raspraviti i redosljed izvođenja raspravnih radnji, održana je 28. novembra 2011. godine u Tuzli.

Na formalnoj raspravi, održanoj 2. decembra 2011. godine u Tuzli, strane u postupku su prezentirale svoje dokaze kako bi se utvrdila istinitost njihovih tvrdnji. Obradivano je svako od pitanja redom kojim su i nominirana, najprije izlaganjem odgovora podnosioca zahtjeva, a potom izlaganjem komentara umješača i voditelja postupka.

U pripremnj, odnosno formalnoj raspravi su aktivno učestvovala pismeno opunomoćena lica podnosioca zahtjeva – v.d. generalnog direktora sa saradnicima (punomoć pod brojem: 01-6565/2011 od 30. novembra 2011. godine), te opunomoćeni umješača – rukovodioci i saradnici ispred MH “Elektroprivrede Republike Srpske”, Matično preduzeće, a.d. Trebinje (punomoć pod brojem: I-1/03/2-2100-9/11 od 28. novembra 2011. godine), JP “Elektroprivrede Hrvatske zajednice Herceg Bosne” d.d. Mostar (punomoć pod brojem: I-12179/11 od 24. novembra 2011. godine), JP “Elektroprivrede Bosne i Hercegovine” d.d. Sarajevo (punomoć pod brojem: 01-04-32269/2011 od 30. novembra 2011. godine) i “Aluminija” d.d. iz Mostara (punomoć pod brojem: 4742/11).

Izvještaj voditelja postupka opisuje tok postupka, ponuđene dokaze i utvrđene činjenice, relevantne pravne odredbe i preporuku članovima Komisije (u daljem tekstu: Komisija) i dostavljen je stranci u postupku aktom DERK–a, broj: 04-28-5-272-43/11 od 9. decembra 2011. godine, te trećim zainteresiranim licima koja su dokazala direktan interes da učestvuju u tarifnom postupku i kojima je takav status pravovaljano priznat od strane DERK-a. Analiza troškova i prihoda, izložena u izvještaju voditelja potvrđuje, odbija ili prilagođava pojedinačne stavke, veličine ili metode korištene za pripremu prijedloga tarife, u skladu sa diskrecijskim pravima DERK–a u tarifnom postupku.

Izvještaj je trebao da pruži razumnu osnovu Komisiji da na predočenim podacima, argumentima i pojašnjenjima, te komentarima Kompanije (broj: 01-6762/11 od 14. decembra 2011. godine) i zainteresiranih lica: Aluminij d.d. iz Mostara (komentari pod brojem: 5011/11 od 13. decembra 2011. godine) i JP “Elektroprivreda Bosne i Hercegovine” d.d. – Sarajevo (komentari zaprimljeni pod brojem: 04-28-5-272-47/11 od 14. decembra 2011.), datim na prijedlog ovog izvještaja, nakon što ih pažljivo razmotri i procijeni, donese svoju konačnu odluku o podnijetom zahtjevu.

Komisija, dakle, usmjerava svoja razmatranja na sve elemente u troškovnoj strukturi koje je isticao podnosilac zahtjeva, analizu troškova i prihoda izloženu u izvještaju voditelja postupka, kao i komentare podnosioca zahtjeva i umješača podnošenih u toku cijelog

postupka, da bi cjelovitom observacijom odlučila o podnijetom zahtjevu. Slijedom takve obaveze, Komisija izlaže slijedeća svoja stanovišta:

Po osnovu *troškova materijala* Kompanija je zatražila 6.350.000 KM. Zatraženi iznos znatno premašuje ostvarenja iz perioda 2006-2010. godina koja su se kretala u rasponu od 3,3 do 4,6 mil. KM. Prema zahtjevu Kompanije procjena je da će se u 2011. godini u okviru troškova materijala potrošiti oko 5 mil. KM, što je iznos u visini odobrenog u prethodnom tarifnom postupku.

Kompanija se potrudila ukazati na opravdanost ovih pozicija kroz navođenje niza podataka o kretanju cijena baznih sirovina (bakar, aluminij, čelik, nafta) na svjetskom tržištu. Mada se ne može reći da navedeno nema uzročno posljedičnu vezu, moglo bi se više opravdanja naći u navodima o potrebi znatno efikasnijeg donošenja odluka o operativnim zadacima i njihovim izvršenjima u odnosu na prethodni period, a što će onda dovesti i do povećanja predmetnih troškova. Uvažavajući činjenicu da postoje uvećane potrebe za nabavkom materijala i rezervih dijelova kako bi se operativni rad Kompanije nesmatano odvijao, Komisija odobrava iznos od 5.500.000 KM u okviru ove troškovne pozicije, što predstavlja povećanje od 10% u odnosu na iznos odobren u prethodnom tarifnom postupku.

Po osnovu *troškova usluga* Kompanija je zahtijevala iznos od 5.650.000 KM. U prethodnom tarifnom postupku ovi troškovi odobreni su u iznosu od 4.650.000 KM, a njihova realizacija u periodu 2006-2010. godina kretala se u rasponu od 3,6 do 5,8 mil. KM zavisno od posmatrane godine. Procjena izvršenja u 2011. godini iznosi 4.613.678 KM, što je u okvirima odobrenog u prethodnom tarifnom postupku.

U samom zahtjevu Kompanija traženi iznos nije detaljnije obrazlagala, a na formalnoj raspravi je to činila sličnim argumentima koje je koristila i pri demonstraciji analize troškova materijala, tj. da je došlo do porasta cijena usluga na tržištu u prethodnom periodu. Prihvatajući procjenu voditelja postupka da se osigura uvećanje iznosa namijenjenog za troškove proizvodnih usluga, Komisija za 2012. godinu odobrava iznos od 5.200.000 KM što predstavlja povećanje od blizu 13% u odnosu na procijenjeni trošak usluga u 2011. godini.

Po osnovu *ostalih troškova* Kompanija je, ne obrazlažući ih posebno, zahtijevala iznos od 4.750.000 KM. Njihovo ostvarenje za protekli period imalo je trend smanjenja od 7,2 mil. KM u 2007. godini do 4,4 mil. KM u 2010. godini. Kompanija daje procjenu ostvarenja za 2011. godinu u iznosu 4.728.558 KM, što je u okvirima odobrenog iznosa u prethodnom tarifnom postupku. Primjereno tome, Komisija ovako utvrđen iznos od 4.750.000 KM potvrđuje kao Kompaniji odobreni iznos na troškovnoj poziciji *ostalih troškova* za 2012. godinu.

Na ime *ostalih i vanrednih rashoda* Kompanija je tražila 1.007.800 KM, što je manje u odnosu na ostvarenje u periodu 2007-2010. godina. Potrebno je istaći da procjena *ostalih i vanrednih rashoda* za 2011. godinu iznosi 8.600.000 KM i ona je posljedica izvršenja sudskih odluka kako je i navedeno u Izvještaju voditelja postupka. U pogledu ovih rashoda za 2012. godinu, prihvata se prijedlog voditelja postupka i odobrava iznos *ostalih i vanrednih rashoda* za 2010. godinu u visini od 1.007.800 KM.

Kompanija u svom zahtjevu po osnovu *troškova radne snage* traži iznos od 59.857.200 KM i navodi da je to “20,34% više u odnosu na odobrene troškove radne snage za 2010. godinu. Pri tom treba znati da se planira povećanje troškova za plate u iznosu od 3% i povećanje troškova da bi se saniralo stanje povodom tužbi zaposlenih za razliku plata sa kojim Kompanija ulazi u 2012. godinu u iznosu od 8.625.000 KM”.

U prethodnom tarifnom postupku Kompaniji je odobren iznos od 49.740.000 KM na ime troška radne snage. U 2010. godini Kompanija je ostvarila 46,4 mil. KM u okviru ovih troškova, dok je u 2011. godini Kompanija zauzela stav da kompletna isplata sredstava po osnovu sudskih odluka treba ići na teret odobrenih sredstava za trošak radne snage u 2011. godini (preneseno odobrenje iz tarifnog postupka za 2010. godinu u iznosu od 49.740.000 KM) i da se imaju knjižiti kao trošak ovog perioda, do visine isplaćenog. Dosljedna u svom stavu o striktnoj ograničenosti na regulatorni odobreni iznos, Kompanija je već isplatila zarađene plaće za 10. mjesec zaposlenicima s umanjnjem od 50% i najavljuje isplatu plaće za 11. mjesec u iznosu od oko 30% zarađenog. U izvještaju voditelja postupka detaljno su analizirane sve okolnosti vezane za opisano postupanje, a data je i ocjena opravdanosti i usklađenosti preduzetih radnji sa stanovišta principa računovodstvene teorije i prakse.

Potrebno je istaći da je u periodu I-IX 2011. godine, kao posljedica prethodno opisanog postupanja, prosječna neto plata u Kompaniji iznosila 1.334 KM, što je niže od iznosa koji je zacrtan kao ciljni kod odobravanja troškova radne snage u prethodnom tarifnom postupku. Iz tog razloga se odobrava povećanje od 17%, što bi prosječne neto plate u Kompaniji dovelo na iznos od 1.561 KM, a što je vrijednost koja je u okvirima prosječnog nivoa zarada u elektroenergetskom sektoru BiH i što je bila ciljna vrijednost i u prethodnom tarifnom postupku. Ovakva projekcija uz pripadajuće naknade i ostale stavke koje obuhvataju troškovi radne snage daje iznos od 46 mil. KM na ime troškova radne snage. Imajući u vidu kontinuirano smanjenje broja zaposlenih u Kompaniji u proteklom periodu, u najvećoj mjeri kao posljedicu prirodnog odliva, pri čemu je broj zaposlenih sa 1.495, u početku rada Kompanije, pao na 1.273 (oktobar 2011. godine), a nastojeći da konačno preokrene tu nepovoljnu tendenciju i omogući zapošljavanje stručnih kadrova za kojim Kompanija svo vrijeme iskazuje potrebu, Komisija uvećava prethodni iznos za 1,8 mil. KM i odobrava ukupno 47.810.000 KM na ime *troškova radne snage* za 2012. godinu.

Rasprava je posvetila veliku pažnju pitanju *troška amortizacije*, pogotovu u kontekstu investiranja i aktiviranja sredstava, a na ozbiljnost ovog problema i potrebu velikog opreza u njegovom rješavanju, ukazali su umješači i zainteresirani koji nisu imali taj status. U prethodnom periodu je u zahtjevima Kompanije iskazivan veći trošak amortizacije nego što je realiziran, a što se dešavalo kao posljedica nerealnosti procjene vremena u kome će nova sredstva biti aktivirana. Kako nema dokaza o izglednijem aktiviranju novih objekata i sredstava, rukovodeći se dosadašnjim iskustvima i u nastojanju da se izbjegnju značajnija odstupanja, Komisija odobrava trošak amortizacije za 2012. godinu u onom iznosu koji se realizira u 2011. godini, dakle 51.992.235 KM.

Za iznos *troškova kamata* u zahtjevu nije dato detaljnije objašnjenje, a ni tokom formalne rasprave nije bilo diskusija o ovoj grupi troškova. Očigledno je da Kompanija znatno bolje procjenjuje i planira trošak kamata u odnosu na raniji period. Uz to prisutna je tendencija da se ovaj trošak kontinuirano smanjuje i da se za 2012. godinu procjenjuje na 4.121.004 KM, što je 3,5 mil. KM manje od ostvarenog u 2010. godini. U potrebni prihod Kompanije za 2012. godinu odobravaju se troškovi kamata u iznosu od 4.121.004 KM, u skladu sa *Tarifnom metodologijom*, kao trošak duga u okviru prosječnih ponderiranih troškova kapitala, u iznosu koji je zatražen i obrazložen dodatnim podacima o postojećim kreditima Kompanije.

U skladu sa članom 17. *Tarifne metodologije*, Kompaniji se kao opravdani trošak priznaje i iznos od 1.410.000 KM po osnovu obaveze plaćanja *regulatorne naknade* u visini propisanoj *Odlukom o utvrđivanju regulatorne naknade u 2012. godini* ("Službeni glasnik BiH", broj 83/11).

Kad je u pitanju *dobit* Kompanije, prema dostavljenim podacima o poslovanju, u prethodnom periodu ostvarivana je dobit veća od planirane. Kompanija je i u ovom tarifnom postupku zahtijevala odobravanje bruto dobiti u iznosu od oko 8,6 mil. KM od čega 3,3 mil. KM poreza i 5,3 mil. KM neto dobiti. Rasprava je ukazala da nema razloga za odobravanje dobiti pogotovo u situaciji kada već postoji ogromna akumulirana dobit koju bi Kompanija na jednostavan način mogla uvećati oročavanjem bar dijela pomenutih sredstava. Komisija stoji na stanovištu da se ipak može odobriti dobit u iznosu od 0,67% na vrijednost kapitala Kompanije koji iznosi 872.819.277 KM (procjena iz bilansa stanja na dan 31.12.2011. godine). Na ovaj način se Kompaniji odobrava na ime dobiti 5.838.054 KM, a pored toga Kompanija je dužna da svoje finansijske prihode u 2012. godini dodatno poveća oročavanjem gotovinskih sredstava koja se nalaze na računima Kompanije, a koja su do sada tretirana na neodgovarajući način.

ITC mehanizam je mehanizam kompenzacije koji omogućava pokrivanje troškova na prijenosnoj mreži koji nastaju usljed prekograničnih tokova. Shodno članu 16. *Tarifne metodologije* potrební prihod za obavljanje regulirane djelatnosti umanjuje se za iznos ostalih prihoda koji se odnose na reguliranu djelatnost uključujući neto iznos (prihod – rashod) ostvaren od prekogranične tokova.

Prvobitno, BiH je učestvovala u ITC mehanizmu zemalja jugoistočne Evrope. Zajednički evropski ITC mehanizam koji obuhvata 26 zemalja i 31 operatora prijenosnog sistema, stupio je na snagu 1. juna 2007. godine. Na osnovu prihoda u prethodnom periodu i podataka o prekograničnoj trgovini u aktuelnom periodu može se procijeniti nivo prihoda od primjene ITC mehanizma u 2012. godini na 5.500.000 KM.

Prihod od aukcija prekograničnih prijenosnih kapaciteta, takođe predstavlja vrstu prihoda koji se tretira u skladu sa članom 16. *Tarifne metodologije*. Ove prihode Kompanija ostvaruje od 2010. godine, a prema podacima za 2011. godinu i rezultatima godišnje aukcije za 2012. godinu, ukupni prihod po osnovu dodjele prekograničnih prijenosnih kapaciteta za 2012. godinu može se procijeniti u iznosu od 7.500.00 KM.

Potrebni prihod za obavljanje regulirane djelatnosti umanjuje se za iznos amortizacije na donirana sredstva u visini od 2.860.510 KM, a u skladu sa ustaljenim principima i praksom koju DERK redovno primjenjuje prilikom utvrđivanja tarifa za regulirane subjekte u svojoj nadležnosti.

Shodno naprijed rečenom, potrebni prihod za obavljanje regulirane djelatnosti umanjuje se za iznos finansijskih prihoda koje će Kompanija osigurati oročavanjem dijela sredstava koji se nalaze na računima Kompanije. Treba istaći da se ova sredstva tretirana na dosadašnji način, u određenom smislu obezvrjeđuju, a da bi to spriječila, Komisija po osnovu oročavanja pomenutih sredstava utvrđuje finansijski prihod u 2012. godini u visini od 7.000.000 KM.

Na osnovu obavljene analize zahtjeva Kompanije, Komisija je ocijenila da realna suma ukupnih troškova i rashoda Kompanije za 2012. godinu iznosi 127.629.113 KM, odnosno 104.768.603 KM po odbitku prethodno navedenih prihoda od prekogranične trgovine, amortizacije doniranih sredstava i finansijskih prihoda.

Pregled troškova i rashoda dat je u narednoj tabeli.

Troškovi i rashodi (KM)	2010. odobreno	2010. ostvareno	2011. procjena	2012. traženo	2012. odobreno
1	2	3	4	5	6
Troškovi materijala i rezervnih dijelova	5 000 000	3 371 308	4 989 472	6 350 000	5 500 000
Troškovi usluga	4 650 000	5 835 655	4 613 678	5 650 000	5 200 000
Troškovi radne snage	49 740 000	46 409 084	49 740 000	59 857 200	47 810 000
Amortizacija	57 495 726	55 338 233	51 992 235	56 962 108	51 992 235
Troškovi kamata	7 227 780	7 633 730	4 257 449	4 121 024	4 121 024
Ostali troškovi	4 750 000	4 445 032	4 728 558	4 750 000	4 750 000
Ostali i vanredni rashodi	500 000	4 400 993	8 600 000	1 007 800	1 007 800
Regulatorna naknada	1 308 000	1 308 000	1 388 000	1 410 000	1 410 000
Bruto dobit	6 490 322	23 094 016	12 997 695	8 600 000	5 838 054
1.Ukupno troškovi i bruto dobit	137 161 828	151 836 051	143 307 087	148 708 132	127 629 113
2. Prihod od ITC mehanizma	8 000 000	8 000 000	8 000 000	4 025 156	5 500 000
3. Prihod od alokacije prekograničnih kapaciteta		1 219 484	7 500 000	7 537 424	7 500 000
4. Ostali prihodi (donirana sredstva)	3 290 296	4 439 406	5 500 010	2 860 510	2 860 510
5. Finansijski prihod					7 000 000
6. Potrebni prihod (1.-2.-3.-4.-5.)	125 871 532	138 177 162	122 307 077	134 285 042	104 768 603
Ostvarena neto dobit	5 710 000	20 110 929	10 056 088	5 287 326	
Energija (kWh)	14 196 450 000				12 072 550 000
Snaga (kW)	24 042 600				24 900 000
Prosječna mrežarina (pf/kWh)	0,870				0,868
Mrežarina za energiju (pf/kWh)	0,566				0,564
Mrežarina za snagu (KM/kW)	1,478				1,473

Energija na osnovu koje se izračunava prijenosna tarifa iznosi 12.072.550.000 kWh i određena je na način da je prosječna stopa porasta potrošnje u prethodnom petogodišnjem periodu od 1,45% primijenjena na procijenjeni iznos energije preuzimanja sa mreže prijenosa u 2011. godini od 11.900 GWh.

Uzimajući u obzir stavove iskazane u tarifnom postupku, smjernice sadržane u evropskoj regulativi u pogledu tarifiranja prijenosa električne energije, stanje u bližem i širem okruženju, određuje se da komponenta *L* koju plaćaju kupci električne energije iznosi 100%, a komponenta *G* koju plaćaju proizvođači električne energije iznosi 0%.

Prijenosna mrežarina za snagu i prijenosna mrežarina za energiju izračunavaju se prema odnosu snage i energije 35%:65%, u skladu sa *Tarifnom metodologijom*.

Prijenosna mrežarina za snagu iznosi 1,473 KM/kW i obračunava se mjesečno kupcima na osnovu zbira neistovremenih vršnih opterećenja u tačkama preuzimanja. Na osnovu utvrđene vrijednosti energije preuzimanja na prijenosnoj mreži i podataka o odnosu istovremenih i neistovremenih vršnih opterećenja u 2010. i 2011. godini, određuje se ukupni iznos fakturirane snage na godišnjem nivou od 24.900.000 kW.

Prijenosna mrežarina za energiju iznosi 0,564 feninga/kWh kao odnos potrebnog prihoda koji se prikuplja od kupaca umanjen za dio koji se odnosi na snagu i preuzete energije sa mreže prijenosna od 12.072.550.000 kWh.

Prednje navedene tarife, po uvjerenju Komisije, osiguravaju potrebni prihod za efikasno, sigurno i pouzdano poslovanje Kompanije, odnosno omogućavaju pokriće svih razumno nastalih troškova i rashoda u poslovanju.

Ova odluka stupit će na snagu danom donošenja, a primjenjivat će se od 1. decembra 2012. godine s obzirom na ciljeve njenog donošenja.

Prvi cilj je da se odluka o tarifama uskladi sa Tarifnom metodologijom, koja je izmijenjena u septembru 2011. godine i eliminira u praksi dosada egzistirajuća protivrječnost između važećih tarifa i izmijenjene metodologije. Drugi cilj je da se odloženom primjenom osigura ravnopravan tretman svih učesnika na tržištu električne energije u Bosni i Hercegovini. Naime, zaključujući tržišne aranžmane za 2012. godinu svi učesnici na tržištu nisu bili svjesni mogućih promjena u prijenosnoj tarifi i refleksija tih promjena na rentabilnost zaključenih aranžmana. U takvoj situaciji Komisija se nije odlučila za mijenjanje pravila nakon što su svi godišnji izvozni aranžamani već zaključeni, već za odloženo dejstvo nove prijenosne tarife. Na ovaj način će se osigurati ravnopravnost svih učesnika na tržištu tako da isti uvjeti vrijede za sve zaključene tržišne aranžamane od početka do završetka njihovog trajanja.

U okvirima razumnog diskrecijskog prava Komisije da potvrdi reprezentativnost i opravdanost svih podnijetih podataka i tvrdnji, da procijeni stepen vjerojatnoće ostvarenja svih procijenjenih troškova i rashoda, na osnovu sveobuhvatnog razmatranja svih dokaza istaknutih u zahtjevu, izvještaju voditelja postupka, komentarima podnosioca zahtjeva i zainteresiranih lica (umješača), Komisija donosi odluku kao u dispozitivu.

DERK će kontinuirano pratiti efekte primjene usvojenih tarifa zadržavajući pravo podešavanja tarifa kada ocijeni da je to potrebno.

Shodno članu 14. *Pravilnika o tarifnom postupku*, podnosilac zahtjeva kao regulirani subjekat ima obavezu osigurati pristup javnosti zvanično odobrenoj tarifi, tako da ovom odlukom odobrena tarifa bude na raspolaganju javnosti u njegovom glavnom uredu tokom radnih dana i objavljena na njegovoj internet stranici.

U skladu sa članom 9.2 *Zakona o prijenosu, regulatoru i operatoru sistema električne energije u Bosni i Hercegovini*, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 04-28-5-272-54/11

Predsjedavajući Komisije

26. aprila 2012. godine

Tuzla

Nikola Pejić